



Tužilaštvo BiH ispravlja greške iz 2011.

Jovan Lukić, kojeg je Sud BiH oslobodio, pominje se u izvještaju **SIPA** kao dio grupe koja je oštetila budžet Bosne i Hercegovine za oko četiri miliona KM

Državna agencija za istrage i zaštitu (SIPA) podnijela je 3. februara Tužilaštvu Bosne i Hercegovine izvještaj o počinjenom krivičnom djelu protiv četrnaest fizičkih osoba i tri pravne osobe zbog postojanja osnovna sumnje da su počinile krivično djelo iz člana 250. Krivičnog zakona BiH, organizirani kriminal, u vezi sa krivičnim djelima iz člana 210, poreska utaja ili prevara, iz člana 216. carinska prevara i iz člana 209. pranje novca, a sve u vezi sa članovima 54. i 29. istog zakona.

Imena osumnjičenih

Sve što je javnosti tada saopšteno jeste da postoje osnovi sumnje da su navedene osobe pružale lažne podatke carinskom organu prilikom uvoza robe, u namjeri da izbjegnju plaćanje carine i drugih dažbina koje se plaćaju prilikom uvoza, čime su oštetili državni budžet za oko četiri miliona KM. Više detalja o tome o kojim firmama i fizičkim licima je riječ u **SIPA**, ali ni u državnom Tužilaštvu ne otkrivaju.

Međutim, Oslobođenje iz svojih dobro obaviještenih izvora saznaje da je, ustvari, riječ o predmetu još iz 2011. godine. Naši sagovornici cijene da je bilo logičnije da su nova saznanja o počinjenim krivičnim djelima trebala biti samo dopuna izvještaja koji je tada podnesen, s tim da su sada uvrštena nova imena osoba koje se sumnjiče za navedena krivična djela.

Jedna od tri firme koja se spominje u dokumentu **SIPA** je Ducla trading,

čiji je vlasnik Jovan Lukić, koji u Modriči ima hotel i koji je okarakterisan kao ključna figura u ovoj priči. Ova firma je, otkrivaju naši izvori, jedan od najvećih uvoznika prehrambenog programa u BiH, a uvozi konzerviranu ribu, maslinovo ulje, čokolade te hranu za pse i mačke. Ducla je ovim proizvodima snabdijevala vodeće trgovinske lance u Srbiji, Crnoj Gori, na Kosovu, u Sloveniji, Makedoniji, Bugarskoj i Rumuniji.

- Osumnjičeni su robu nabavljali iz Njemačke i Amerike, a onda je putem offshore firmi isporučivali na tržište Bosne i Hercegovine po znatno umanjenim vrijednostima, odnosno plaćali su manje obaveze, reče nam je.

Ime Jovana Lukića dobro je poznato bh. pravosuđu. Još 2018. Tužilaštvo BiH podiglo je optužnicu protiv Lukića za poreznu utaju. Optužen je da u svojstvu osnivača i odgovornog lica bez ograničenja ovlaštenja u okviru registrovane djelatnosti u firmi Ducla d. o. o. Modriča, kao i firmi Ducla d. o. o. Modriča, u toku 2015. nije obračunao i prikazao izlazni PDV u poreznim prijavama od 34.970 KM. Za taj iznos oštetili su državni budžet.

Presuda iz Srbije

Optuženi su se teretili da su počinili krivično djelo porezne utaje ili prevare. Međutim, Apelaciono vijeće Suda BiH je 9. decembra 2019. donijelo presudu kojom su Lukić i

firma Ducla oslobođeni optužbe za krivično djelo porezna utaja ili prevara. Kako saznajemo, Lukić se trenutno nalazi u Beogradu, a na Dedinju posjeduje vilu milionske vrijednosti. MUP Srbije još odranije ima njegov podebeo dosje, a 2015. tamošnji sud ga je osudio na godinu i po zatvora, jer je kao vlasnik preduzeća Jugobranton u novembru 2007. neovlašteno dao na upotrebu supstance za proizvodnju amfetamina.

AMELA LONČARIĆ

Robu su nabavljali iz Njemačke i Amerike a putem offshore firmi isporučivali su je u Bosnu i Hercegovinu po znatno umanjenim vrijednostima



Okorjelog kriminalca u BiH još nije stigla ruka pravde / DIDIER TORCHE